

I y a acaure des gens qui peuvent ramembrair lé tchuriaux naufrage d'aën baté sus des rotchers à Albecq lé prumier d'octobre, 1937. Lé résultat dé chu naufrage fut raide d'la beuv'rie – et en amas d'rir'rie.

Lé *Briseis*, aën baté français dé treis milles tounniaux, tcheryait enne carchaison dé vin, du litcheur et d'aoutes chaoses. Il avait étaï bâti en 1917 en Allmoigne et il'tait en route d'Oran à Rouen en Normandie. Aën paissounier qui vit l'baté trop près des rotchers par là, dit pus tard qu'il'tait saeure qu'i n'pourrait pas évitair dé tappair sus l'banc d'roques app'laï Les Grunes.

Quând l'baté tappit, lé captoine arrêtit les engins et pis les mit en route derchier pour lé hallair dé d'sus les rotchers. I voulait gognier jusqu'au Vazon qu'est enne banque à sabllaon et il esperait sauvaïr l'baté. P'tête qu'rigage pour navigier était endounagi car i s'trouvit parmi les rotchers au but d'la pouôte du Houmet. Ch'tait enne bouanne affaire qu' l'baté faonçit d'vânt tappair sus aën rotcher car autcheun n'perdit pas sa vie.

Bian vite, enne grande foule dé gens arrivit pour trouvaïr hors tchi qui s'était arrivai. I y en avait des chents tout lé laong d'la caoute, attirais par lé camas sans arrê d'la sirogne du baté. Par chu temps, tous pouvaient veïr qu' l'naïz était bian bas dans iaou et qu' l'arrière c'menchait à l'vaïr en l'aer. Tout d'aën caoup lé naïz trissit sous iaou et au mesme temps les bôileurs bostirent et envyirent d'iaou et du stimme franc en l'aer. L' baté faonçit tout à fait – i y avait rioque lé haut d'sa chim'naïe et d'ses mâts qui mourtaient en d'sus d'la maïr.

Mais i y aeut du brou pus tard! Ossi vite qu' l'baté c'menchit à s'défaire, des barriques dé vin et d'litcheur flotirent lé laong d'la bânque et sus l'sabllaon. I y en avait des chents, et les sians qui guettaient s'élanchirent avau la bânque pour "sauvaïr" les barriques. I créyaient qu' Nougé était dupartemps ch't'onnaïe-là! Lé captoine du *Briseis*, Léon Le Hellidu, quând il avait réalisaï qu' l'baté faonçait, avait ordonnaï l'échipage d'l'abadounnaïr et tous graempirent dans les p'tis batchiaux. Aën p'tit pus tard des paissouniers arrivirent dans laeux batchiaux et towirent les survivants à Grand Havre. I parait qu' l'baté faonçit dans apeuprès septante pids d'iaou et qu'i y avait rioque six pids d'iaou en d'sus des Grunes quând l'baté tappit.

Quând lé captoine fut print à la tac pour veïr tchi qu'était la situation, i fut raide en affaire car i n'pouvait pas caomprendre comme tchi que lé naufrage s'était arrivai – il avait en amas d'expérience dé navigier autour la caoute dé Guernési, supareïlement la caoute du vouest. Lé *Briseis* avait étaï pertusaï sous l'naïz et il'tait possible qu' i y avait du doummage à la tchille étout.

Ossi vite qu' possible, les autoritaïs publièrent enn'avertissement atour la carchaison du baté. I fallait déclairaïr tout chause trouvaïe sus la bânque ou qui flottait dans la maïr au Surveillant d's Etats. I y avait apeuprès treis chenis barriques dé vin d'Algérie à bord et rioque tchiqueunes furent déclairaïes. I y en avait qui furent trouvaïes près d'la pouôte dé St Martin, d'aoutes près dé Saercq, au nord dé l'île et pus liian.

Tout chu temps, d'aoutes barriques furent tappaïes sus la bânque parmi les rocques et les gens buvaient lé vin là ou il'empliaient des bouteilles, des caunes – autcheun chause dans tchi qu' i pouvaient prende lé vin ciz iaeux, mesme (i fut dit pus tard) des pots à châmbre!

Comme dé raisaon, en amas d'gens b'virent bian trop et i y avait raide des bragis par les càmps. I y en avait mesme qui s'ente battaient, et pour aën temps i y aeut du brou dans tchiques caontraies. D'aoutes qu'avaient pus d'sens prinrent laeux barriques ciz iaeux et les muchirent éiouque qu'i pouvaient et il'aeurent du vin pour d's onnales. Pourtant, i faut dire qué l'vin n'était pas d'la millaeure qualitaï!

Dauve lé temps, comme lé baté sé défaisait, d'aoutes barriques flottirent à terre.

Ches-là étaient bian pus p'tites qu'les aoutes, et en amas fortes. Quand i furent tappafes, ch'tait pas du vin qu'était dans ches p'tites barriques, mais enne forte litcheur qui pllaisait bouan frais ès garçons! I y aeut raide des gens qu'avaient ma à la tête pour aën temps souvente lé désastre.

I y aeut raide du d'vis atour lé naufrage du *Briseis*, et comme j'ai déjà mentiounnaï, il est acaure ramembraï au jour d'ogniet.